



PARLAMENTO
NACIONAL
República Democrática de Timor-Leste

BANCADA PARLAMENTAR DO CNRT

Edifísiu Sentral Parlamento Nacional, Rua Bispo de Maderos, Dili, Timor-Leste

Intervensaun Bancada CNRT Proposta Orsamentu Jeral Estadu 2019 Sessaun Jeneralidade

“Libertada a Pátria, Libertemos o Povo”

Vossa Excelências:

- **Senhor Presidente do Parlamentu Nasional, Arão Nôe de Jesus Amaral**
- **Senhor Primeiru-Ministru, Taur Matan Ruak**
- **Kompozisaun Meja do Parlamentu Nasional**
- **Ilustres Deputados do Parlamentu Nasional**
- **Membru VIII Governu Konstitusional**
- **Povu Timor-Leste tomak**

Ho Graça Nai Maromak nian, tulun mós hosi rai lulik no malebian sira-hotu, nune'e ohin ita iha kbiit bót liulán atu diskute povu nia futuru no rai doben Timor-Leste. Ho Sira-Hotu Nia tulun, lora hirak mai ne'e, deputados sira-hotu sei diskute ho kúidadu no prudénsia hodi toma desizaun ba aprovasaun.

Proposta Orsamentu Jeral do Estadu (OJE) tinan fiskal 2019 ne'ebé mak mai hosi Governu hamutuk \$1,827 bilhões de dolares americanos hodi finansia ano fiskal ida ba funsionamentu estadu tomak. Orsamentu ida ho engloba

pakote despesas ba instituisaun estado sira; despeza ba iha Presidência-da-República, Parlamentu Nasional, Governo no Tribunais sira ne'ebé mak hatu'ur iha Programa VIII Governu nian atu hadiak no eleva nível bem-estar povu Timor-Leste tuir padraun Planu Estratégiku Dezenvolvimentu Nasional 2030 no Objétivu Dezenvolvimentu Sustentável.

Antes hahú, Bancada CNRT hakarak felisita no apresia VIII Governo Constitucional ne'ebé lidera hosi Sua Excelência Primeiru-Ministru Taur Matan Ruak ne'ebé ho esforsu tomak elabora Orsamentu Estadu 2019 maské iha tempu ne'ebé mak limitadu lebes. Parabéns Senhor Primeiru-Ministru Taur Matan Ruak no Membru Governu sira-hotu!

Preparasaun maratona, hafoin ita aprova OJE 2018 fulan-tolu liubá, iha tempu mak hanesan tenki konsolida lalais actos ezelesaun OJE 2018 tanba ema balun curioso ho ezelesaun orsamentu iha fulan-hát nia laran. Curiosidade ida ne'e, responde ho ezelesaun ne'ebé Governu mai apresenta iha Parlamentu Nasional atinzi ona liu 70%. Ne'e hatudu mai ami katak, Governu ida ne'e iha duni kapasidade ba jestaun no servisu maka'as hodi kumpri kalendáriu ezelesaun do orsamentu.

Tempu ba ezelesaun fulan-hát deit, obrigadu Membru Governu sira-hotu tenki servisu maka'as duni, inklui halo preparasaun ba dokumentus hotu-hotu, hodi nune'e submetete proposta orsamentu foun ba tinan 2019 dentru de Lei Orsamentu no Jestaun Finansira haruka.

Excelências,

Eventu ból lubuk ida mak V Lejislatura tinan 2018-2023 infrenta hafoin Eleisaun Antesipada, tuir kedas ho posse ba Membru VIII Governo Constitucional ho Aliansa Maioria Parlamentar – AMP, maske to'o ohin loran, Membru Governu indijitadu lubuk ida seidak simu posse. Lejislatura ida ne'e

aprova Programa VIII Governu iha fulan-Jullu, depois halo debate no aprovasaun levantamentu Fundo Petrolíferu hodi finansia Rejime Duodécimal ba fulan-Agusto no Setembru nian. Tuir kedas ho debate Orsamentu Estadu 2018 iha fulan-agosto no Nai Presidente-da-República promulga iha fulan-setembru 2018.

Eventu krusial tebes tanba Lejislatura ida ne'e asumi hela responsabilidade bót atu lori Estadu Timor-Leste sai hosi dependénsia ba Rejime Duodécimal, hodi hakat ba iha orsamentu normal nian. Ita-hotu konsege atravesa siluasaun krusial ida ne'e!

Ami fiar no deposita konfiansa bót ba Governu katak, ezekusaun do orsamentu iha linan ikus ne'e bele atinzi liu 90% luir komprimissu ne'ebé ita halo tiha ona. Ita hotu senti dadaun, OJE 2018 fó ona ís foun ba ekonomia Timor-Leste, halo kondisaun paiz ida ne'e diak ba beibeik hafoin hasoru impasse política iha linan naruk to'o ohin loron, maibé ita-nia setor privadu hahú bók án, actividades negosiu buras ba beibeik, kapasidade de kompra populasaun hahú hikas tanba assisténsia sosial no subsidiu to'o ona iha povu nia liman.

Ami mós laran metin, OJE 2019 sei hametin liután ita-nia ekonomia no konfiansa setór privadu sira, tantu rai laran no hosi rai liur.

Bancada CNRT fó ninia apresiasaun klean tebes ba Orsamentu Estadu 2019 ida ne'e, Governu investe ho política orsamental ne'ebé aposta ba iha diversifikasaun investimentu liuhosi Orsamentu Estadu, liu-liu ba iha tranferénsias pública, infra-estruturas baziku no projetos bót sira no ba iha instiluisaun públiku sira ho kárater atu hametin aliserse ekonomia no sosial.

Transferénsias públicas hamutuk miliaun \$705,1 dolares americanos, representa 38,6% hosi total orsamentu. Orsamentu ida ne'e, alem de investe

ba iha actividades petrolíferos, sei selu subsidiu ba veteranos sira, projetos ZEESM, subsidiu ba convicções religiosas hodi tulun Igreja no relijiaun sira seluk, tulun sociedade sivil no subsidiu ba povu kbiit laek sira iha território Timor laran tomak.

Infra-estruturas, capital desenvolvimentu representa 21,9% (miliaun \$400,2 dolares) ba projetu Tasi Mane, desenvolve área urbana no rurais, harii edifisiu públiku no informatika, inklui desenvolvimentu infra-estrutura bazikas iha munisípiu sira.

Excelências,

Orsamentu Estadu 2019 ida ne'e, haludu momo'os konaba responsabilidade VIII Governo Constitucional nian atu promove desenvolvimentu ne'ebé acrecsida hodi harii aliserse ekonomia no sosial, investimentu iha kapital umano no hadiak kuadru institucional sira hodi dudu kresimentu ekonomia.

Bancada CNRT hakarak dehan, responsabilidade Governu nian atu kompleta eletrisidade ba povu sira ne'ebé mak seidak hetan (representa 17%) hosi 83% ne'ebé hetan ona eletrisidade 24 oras iha território Timor-Leste laran tomak (Lee: Livro 3A OJE 2019, fundos Infra-estrutura). Mais fasil agora, tanba Timor-Leste harii ona Sentral Elétrica Hera, Comoro, Betano no Oecusse ho kapasidade 300 MegaWatt.

Bancada CNRT elojia ho planu OJE 2019 ida neé, tanba kontinua loke estrada iha Kosta-Sul hafoin semana hirak liubá inagura faze 1, no sei kontinua to'o iha Betano Manufahi no Beaço Viqueque, inklui estrada Koridór Norte ne'ebé sei liga Mota-Ain to'o iha Com Lospalos, sei konta mós ho estrada rurais, estrada rejionais, bee-mós no sanitasaun hodi hamelin no haburas actividades sosio-ekonomia no kultura povu tomak.

Dalan seluk ne'ebé haludu dadaun mai ita mak, VIII Governu kontinua introduz expansão do sistema seguransa sosial iha tinan 2019 ne'ebé háktuir iha Programa VIII Governu Konstitusional nian. Ita hatene katak, política seguransa sosial fofon parte hosi dezenvolvimentu ekonomia no sosial paíz ida. Empiricamente, política seguransa sosial iha nasaun demokrasia sira, inklui Timor-Leste hanesan produktu hosi konstelasaun política demokrátiku ida hodi hametin bem-estar povu, dezenvolve demokratizasaun política no konsolida ita-nia demokrasia atu metin ba beibeik nafatin.

Seguransa sosial núdar direitos vinculativos ba funsionáriu sira-hotu; militar, polisia, profesores, enfermeira, parteira, doutor, no seluk tán iha setór públiku no setór privadu hodi bele proteze direitu servisu nain sira bainhira sira atinzi ona idade da reforma.

Alem de ne'e, introduz mós meios adequadu oinsá halo investimentu agressiva para bele aumenta ita-nia receitas do estado. Governu liuhosi Xéfi Negosiadór Prinsipal Maun Bót Kay Rala Xanana Gusmão halo negosiasaun ba Fronteira Marítima ho Commonwealth da Austrália hodi halo akordu nesesáriu ho kompañia petrolíferas sira ba dezenvolvimentu Kampu Gás Greater Sunrise.

Negosiasaun brilhante ida ne'e, hakotu ho vitoria Timor-Leste, tanba kompañia ConocoPhillips hosi América no Shell hosi Austrália hakarak fa'an sira-nia asõens mai iha Timor-Leste, liuhosi Kompañia Estatal Timor Gap EP, hamuluk 56,56%. Dalan hahú nakloke, no oportunidade hahú bót liulán ba Timor-Leste ninia partisipasaun iha dezenvolvimentu Greater Sunrise hodi lori lalais kadoras mai iha Beço Viqueque.

Partisipasaun Timor-Leste iha dezenvolvimentu Greater Sunrise fó esperansa bót liu ba Timor-oan sira tanba ita hametin beibeik konfiansa internacional,

investidór sira hahú fihir ita-nia rai, projesaun reseitas mais serteza no actividades ekonómika sei bele buras liután iha futuru.

Esforsu Governu ida ne'e hatudu, halo diversifikasaun ba Fundo Petrolíferu, fundo soberanu iha ne'ebé iha diresaun kompremitidu, serteza no sustentável tanba; (1) investe liuhosi Orsamentu Jeral do Estadu hodi funsiona mákina estado, halo estabilizasaun ba actividades ekonomia no sosial paiz nian, rekursu umano, infra-estruturas nomós hametin servisu públiku ba povu; (2) investe agressivamente iha merkadu finanseiru tuir Lei Fundo Petrolíferu haruka; no (3) invesle iha indústria extractivas, nune'e bele hetan reseitas própria ba iha ita-nia fundo soberano ka konta Fundo Petrolíferu nian.

Vizaun ida ne'ebé estratéjiku hodi kontinua halo esforsu holu-hotu atu aumenta reseitas fundo soberano Timor-Leste nian, tanba ezijénsia hosi desenvolvimentu iha loron aban, Timor-Leste sei prezisa osan barak liután hodi halo desenvolvimentu tuir mehi bót PED 2011 - 2030.

Excelências,

Kestaun fundamental ne'ebé ita hasoru dadaun mak kampu servisu ba idade produtivu sira. Tanba-ne'e, tinan oin tenki tinan ejizénsia ba komprimissu AMP nian oinsá mak buka solusaun ba problema dezempregu iha ita-nia rai, tinan krusial maske nota kalkusaun Orsamentu Estadu ida ne'e mai ho kuidadu tebes no rigorozu ba despeza sira. Maibé, ami fiar metin katak, VIII Governu sei ezejuta tuir disiplina planu orsamental, buka dalan holu-hotu, atu nune'e bele forsenese efeitu pozitivu ba timor-oan sira hodi hetan netik servisu atu sustenta sira-nia moris.

Argumentu ida ne'e bazeia ba komprimissu polítika AMP nian iha kampaña Eleisaun Antesipada 2018, no Planu Estratéjiku Nasional Empregu nian ne'ebé dezefia ona iha VI Governu liubá. Ami fiar, kontinua deposita ami-nia

konfiansa ba kapasidade Primeiru-Ministru Taur Matan Ruak ho Membro Governu sira atu loke oportunidade servisu ba joven sira iha área produtivu sira.

Forsa traballu 31% hosi total populasaun Timor-Leste haktuir iha Relatóriu Inquérito à Força de Trabalho tinan 2013, no kontinua aumenta sa'e tinan-tinan no sei Governu labele solusiona, alem de sei hamosu desigualdade sosial no distúrbios sosial, demanda povu asesu ba bens no sasan sei tu'un iha merkadu, nune'e sei halo investedores sai hosi ita-nia rai, no lakohi abranze sira-nia investimentu ka harii indústria foun.

Tanba-ne'e, tinan oin, gradualmente tenki sai ona esperansa no atualizasaun komprimissu VIII Governu hodi viabiliza setór extrativas no área produtivu sira seluk tán atu absorve dezempregu ba ita-nia joven sira.

Excelências,

Governu ida ne'e komprende diak tebes prinsípiu kontinuidade programa hosi IV Governu, V no VI Governo Constitucional ho diresaun klaru, tanba banati tuir Planu Estratéjiku Dezenvolvimentu Nasional 2011-2030. Diresaun ne'ebé klaru sei hametin ita-nia aliserse ba dezenvolvimentu nasional.

Hodi hakotu, Bancada CNRT no AMP - Aliansa Maiorja Parlamentar fó konfiansa tomak ba Primeiru-Ministru Taur Matan Ruak hamutuk ho Xéfi Negosiadór Prinsipal Maun Bót Kay Rala Xanana Gusmão ne'ebé halo dadaun esforsu hotu-hotu mais posivel halo investimentu hodi lori Timor-Leste ba futuru ida nabilan ba povu tomak.

Ami la haluha atu kongratula Xéfi Negosiadór Maun Bót Xanana ho ninia ekipa tomak tanba fulan hirak mai ne'e ita sei ratifika Fronteira Marítima, núdar obra briliente ne'ebé manifesta servisu maka'as hodi mánan

negosiasaun. Iha tempu mak la kleur, konsege sosa mós maioria asõens Kampu Petrolíferas Greater Sunrise liu 56,56% hodi loke tán dalan ba iha partisipasaun Kompânia Minarai Estatal Timor Gap EP. iha Kampu Gás Greater Sunrise, no possibilidade bót sei lori kadoras mai iha Beaçõ Viqueque tuir espetativa povu Timor-Leste tomak. Parabéns Timor-Leste!

Ikus liu, Bancada CNRT reafirma ninia konfiansa de votos tomak ba Proposta OJE 2019 ida ne'e, nune'e, ami sei fó votos a favor ba aprovasaun jeneralidade orsamentu ida ne'e, tanba priénxe ona rekeztus formais no constilucionais.

Fiar Án La'õ Ba Oin!

Hamutuk HametIn Nasaun!

Obrigado wain.

Díli: 12 Dezembru 2018

Presidente do Bancada CNRT,

Duarte Nunes